



05361

平水清周
書朝儀

勅封太安人金母陳氏墓誌銘

陳氏

陳氏

太安人陳氏者贈承德郎戶部主事賓魯公之配憲副君時舒之母也太安人生正德庚辰年八月十七

日午時卒萬曆庚戌年五月廿三日巳時享壽九十

有一戶部公先太安人卒葬于邑鳳山之原今憲副

君將奉太安人柩啓窆而合焉先期持所為狀謁余

請銘淚淋零下不能自禁也余慰之曰太安人躬被

綸命壽考令終即不為百歲人亦人世所罕觀矣君

何痛割之深也憲副君為余言曰世所稱婦順母德

大都事舅姑孝相夫子勤教子義方顧遭時履順易

田亭草卷十七

七

三十九
蔡元

為力耳乃吾母太安人所處有極難者母歸先府君

時先大母徐蚤世繼大母沈為大父清湖公榘家有

女七人長者責資裝少者責膏沐并珥先府君業儒

不治家人產咸于母取辦焉數米之炊雖巧婦無能

饒給稍弗愜意即譴訶及矣甚則箠朴隨之母怡色

吞聲不敢萌憤懣態怔管綴緝務曲當大母心是吾

母之奉舅姑難也先府君承先世薄業計田畝所入

不能具饘粥授徒里中脩脯董董母佐以女紅宵旰

勤必屬嘉靖之季兵燹騷亂生計日絀里隣有忍辱

立槁者母鬻力程口勉濟糴殮比寇難平歲稍豐登

始漿酒臠肉相慶也而先府君性慷慨閒適時有
賓客過從之懽母鮮腆供具絕不以窘匱爲解是吾
母之相君子難也不肖時舒駕劣先府君授之一經
母給楮穎膏燭膏之甚厲顧不能無嬉惰以煩櫛楚
又或觸母怒至徹其所膳驅之詣塾稍長游賢豪間
知憤發矣母嘗質衣簪供文社飯而礪鈍策蹇寸進
殊淹碌碌曹卽食貧如舊既剖符畿輔方極意拊循
庶幾無得罪百姓顧值兇弁之搆以當斷不斷受母
誚責是吾母之教子又若此其難也曩不肖將丐休
稟命吾母母忻然曰吾志也與子偕隱居恒一蔬一
肉守先人舊廬無它羨比荷 聖明采錄起官潮陽
銘心報稱循級而登方構數椽之居以妥吾母晨夕
工未竣而母不待矣臨終猶啜啜誠詔願就先廬爲
正寢吾與若父偕老歌斯哭斯兒慎毋違吾志嗟乎
不肖罔極之報謂何此所爲淚血腐心不能自解也
余謂太安人事舅姑相君子先後百艱叢集矢志恪
勤以克有濟其賢於恒情殆十倍之憲副君行止進
退一稟於義命駕五馬者再力摧彊禦綏蒸黔兢
兢爲善養計乃蓼莪之思又菀結無已時君所爲報
罔極可謂無負君可以輟哀矣狀又稱太安人性豁

蓮方嚴巫兒佛媪不令見面即耄年康豫斗室寂寥不肯向山寺措一趾夫仲弟之嗣託孤女於太安人太安人厚加撫育竟日不離膝下相攸施衿諸事殫心力主之即疾亟猶注意焉其閑家篤親憂然士行如此於以昌金氏後未有涯也太安人葬以卒之年十一月初一日子時窀山坐甲向庚附祖墳之側余欽母德爲銘其墓曰詩稱女士天實釐之從以孫子令德貽之易稱嚴君母與父並風教之宣豈惟內政教于家因教于國有是母乃有是子我銘其藏以永垂麻于女史男女子孫嫁娶之詳具于左

嘉議大夫太僕寺卿玉溪王公墓誌銘

黃生困沉痾謝筆研役而同鄉玉溪王公之子昌胤將敦父葬事以銘墓請黃生曰吾黨有賢士大夫而盛美弗颺朋友之罪也矧吾年籍長兄也爰不辭而狀之公諱任重字尹卿先世居晉江之吳安鄉始于吉安教授公七傳而至公大父諱璉父諱寅皆以公貴贈大中大夫雲南布政司叅政大中公舉公晚其課公學也優游而已公嗜學精進年二十三補邑庠弟子員為嘉靖乙卯越戊午督學胡先生試第一遂薦于鄉隆慶戊辰成進士授官司理廣州廣故號腴

田亭草卷十七

四 黃四 四百

郡又多訟獄公天廉矢慎其約飭若素士聽讞若神明賢聲日振矣屬郡守與舶司構當道郵摘之株累及公遷貳柳州守久之事得白以廉能擢守其郡居三載調貴陽貴陽守入覲以郵傳故謫金華司理蓋柳州多豪家公持法嚴豪家中之當入覲時諸司如故事馳傳會新例束濕甚有所追糾者四人而公與焉坐寡交游乏奧援耳輿論為之稱屈不一載遷貳守維揚遂擢守曲靖自公剖符以來通什邇興熊軾黃堂殆如傳舍又所蒞皆荒服地乃其拊輯黔庶著循良聲閱十載如一日也曲靖政成擢滇南臬副量

移陝西行太僕寺卿迺復晉叅滇藩公先後蒞滇者
三當土酋犍言疆圉用兵之際棟事者仗公若左右
手公廣設方畧豫儲蓄簡行伍明賞罰逆酋底定改
土爲流所勸之力居多尋擢山東憲使董漕儲稽
督多方號令嚴肅運艘魚貫抵潞河既報竣擢滇藩
右伯聲猷益著寢寢開府矣以眼疾丐休致甚懇銓
部惜之擬加太僕寺卿致仕因奉 俞旨云公抵里
則屏貴守寂郡邑大夫自一通刺外無復私謁惟事
關民瘼不靳爲之拯援里民輸粳福全倉苦跋涉抑
索日久公爲請於當道得改折里閭懽呼相與建祠

田亭草卷十七

五

庄四

立碑頌之郡太守竇公雅重公時時造廬請益有匿
賦田當入官者請公酌賦受產公遜謝弗受其砥行
遠利如此公居官居家手未嘗釋卷所著有家訓要
家禮輯順大事宜邊務要畧滇漕二集王太守講章
凡六種公天性慤淳少年時志聖賢之學室牖屋壁
遍粘太極圖西銘時加究玩顧吾閩人篤信紫陽睹
今世譚學者操戈入室不欲以口古爭故遂置弗譚
公守曲靖適江右李中丞公分憲金騰揭止修要義
牘誨諸人士公聞而慕之曰此孔曾正傳於紫陽之

教無所抵牾可信也遂互相衍繹爲諸士譚說即所

謂王太守講章者也吾里中後進夙慕公羣請公蒞
席公又逡巡謝曰道貴實踐不在唇吻所愧實踐
能敢以空譚爲諸君子標幟乎然公於實踐兩言
真不愧者公教歷所至升沉通塞備嘗之矣無喜
亦無愠色其家居誠詔子若孫每遇一飲食衣服
爲言耕耘織紝之苦勤惰奢儉之效疊疊不少置
衣裋褐締紵聲伎珍玩不一呈于耳目靜處一室
正襟默坐盛夏無袒裻夜深無踦踞事不當意無遽
色疾言即朋舊過從杯酒懽洽無談諧謔笑時令童
子歌古詩讀古書而聽之每將就枕亦必誦存經小

學二章曰修身齊家之事盡在是矣或謂公耄矣養

生家宜早宴息公笑曰惟義理可以頤性詩書可以
陶情舍此而譚養生是異術也臨終之夕語不及家

事了莫聞其駭咤鬱伊聲公之學所謂見其大者蓋

昔史遷傳萬石君謂齊魯諸儒質行皆自爲以不及

夫質行如公視齊魯諸儒奚遜焉猶逡巡退讓不欲

以學自標令世人操評者無敢以文多質少爲儒者

病繫公是賴焉矧公所教歷又章章足自表見矣公


墓在邑五都高州山之麓負乙楫辛葬以卒之年十

一月念九日銘曰世有偽儒羊質虎皮亦有迂儒無

當玉卮夫其不言而躬行以蘊藉為措施斯謂有用
之實學微斯人誰與歸佳城閔矣惟令名其永垂

曰亭草卷十七

七



庠生丘君彥肅墓誌銘

君諱維棻彥肅其字君自游黌校時輒與余締文字
社每社日君恒主之一時知名士多樂與交貧者或
仗君館穀以濟其刻厲恬約一青布袍行道中飯脫
粟盤無兼味盖曰吾非故為儉聞諸古人惟澹泊可
以明志耳君雖藝舉子業而嗜古博習父中丞公多
藏書君下帷繙閱證彙今故間為文沈鬱雄勁咸軌
古法而尤篤行好修卓以先民自期許常薄夫彘彘
道學名者曰學顧躬行何如耳歲癸酉君年甫三十
餘輒屏巾衿謝有司辟郡大夫丹陽丁公親勸為之

田亭草卷十七

八
冬三月初五日

駕弗為動日課諸子姪讀書時稱引先德提誨之曰
若輩儻踰繩檢外錯寸趾即以科第顯吾弗願也故
丘氏子姓咸恂恂雅飭而君復躬率勵之終其身靡
懈晚尤精研朱子家禮一書若冠若射博士家久廢
弗講矣君獨撮其要義肄其儀節為諸人士倡間一
舉行之秩秩然卒度也余從宦二十餘年強半里居
君時時過從擇語而發絕不譚人過迺至負悼俗之
懷抱拯世之具則抵掌譚說疊疊不少休親朋宴集
歌呼諧謔或引滿舉白無迂容顧端莊靖穆竟席無
一沉醉語己丑春余應召北上君祖道京郊時一鴈

爲余祝曰願足下勉策高勛功成身退與余爲遠寧
會嗟乎詎謂一別而君遽長往哉君生嘉靖庚子卒
萬曆己丑享年五十君之子宇熙貽余書宦邸請銘
君墓而其甥莊太史狀之余稔知君太史狀特詳迺
按狀序之曰君高祖童曾祖山祖瓊封監察御史贈
大理寺右丞父中丞公養浩開府蜀楚母黃宜人南
安右族也君生六歲而中丞公歿已哀毀如成人事
母黃宜人孝思顧養咸稱篤摯既授室出爲仲父鴻
臚公嗣執喪營葬一如喪葬中丞公追念嗣母洪推
愛外氏割腴田四十頃供外大父丞嘗庶母李故有

恩又夙爲黃宜人所愛君終身母事之歲率諸子女
奉觴爲壽其篤孝如此少稟業于伯兄禎事伯兄如
父行坐不敢並臨事不敢專輒其事嫂如事母平居
如馬少游不冠不敢見也從兄材爲叔父司訓公子
君事之如事伯一門雖睦雅有姜氏風伯兄行海上
倅遇寇挾以購贖君與從兄材皇駭號泣竟傾貲佐
贖歸比二昆相繼天歿諸子女纍纍又大半襁褓中
君悉心拊育畢諸孤昏嫁身獨持三戶綴緝補苴二
昆產藉不旁落姑姊妹暨諸族屬當其身無弗飫君
惠者逮其後嗣無弗德君煦濡者值急難無弗藉君

匍匐赴者君常慷慨自許曰吾幸承先德席世資柰何自愛心力貽葛藟之誚矣君雖折節爲儉至其供祭祀庀祠墓務極豐贍中丞公崇隴穹碑而鴻臚公新阡與司訓中丞並只尺相望序東隣塋塋地一區祠右丞公直不下數百金不以關諸從鴻臚公祠遷之自東奕然翬飛矢棘矣廼中丞公祠則特創宏規敞轟壯麗甚至貸子錢鬻旁產佐厥費或疑其泰侈又或以時詘諷君君曰吾子孫居室渠渠是誰所貽而忍儉其親以舉贏爲諱乎身營目構昕起晏罷者閱三餘載祠成而君告瘁矣疾革無它語惟爲其子


字熙誦言行要留好樣與兒孫心術不可得罪於天地君生平大致如此邑中紳珮下逮賈豎畦孺無不知有丘季君者邦君大夫高其行誼亦嚮慕禮重之夫士豈崇藉科第顯哉君娶常州守張公志選女張歿遂不更娶納妾周氏相室事或竟歲不入室嘗言曰攝身猶置燭也室閉之則堅風暴之則淚世廼忍風燭置其身耶以故生平嗜欲甚節然童卒下壽命也夫子男二長即字熙次字焦墓在某山之原葬以某年某月某日銘曰士固有志豈必一命惟云孝友是亦爲政自古有死豈必喬錢歿垂令名是亦永年

仲子家範彥方鄉誼君實似之籍甚于世幽局長閑
松隴生光雲仍綿綿視此銘章

田亭草卷十七

十一

外三六



江西吉安府通判殷盤翁君墓誌銘

君諱日躋字與新南京戶部員外郎諱堯英君父也
戶部公有詩文名曩忘年與余友對榻譚詩間持君
所爲舉子業示余余嘆羨君千里才也是時君已蜚
聲黌校中矣先後督學使南楚周公西蜀宋公皆特
賞識君初入泮即充試額已遂受龔廩直謂且扶搖
上耳而君自幼有志尚戶部公先令懷集君從在宦
邸猾胥役憚令嚴不敢以私事請則陰入暮金嘗君
君艷然叱之曰若儕謂吾易與耶立白諸戶部公痛
繩之戶部公常亟稱君此兒不第讀父書其志趣才

田亭草卷十七

十一

黃四三百八十八

謂將來殆未可量也所爲奇望君甚厚顧君之進取
方銳而戶部公輒棄賓客矣時君大母太安人曾母
安人林均在養也君居喪戚易兼摯提家當戶惟二
母命是共及居大母喪暨母喪其戚易亦如之戶部
公購田百餘畝祀翁氏始祖而下因旁及外氏以慰
母心勤爲記未及舉行君承先志肇舉之調劑詳悉
且以均二氏子孫之承祀者居恒閉戶讀書與仲氏
日登內戰家政外友知名士治產厲學兩不相妨終

仲身不忍折著仲之嗣遺孤女纍纍遶膝君撫摩

育視已女有加曰鶴鳴在原之念舍是其矣托

外族戚里閤市廛有以貧窶相依災難望拯者君差
次親踈劑量緩急傾貲力濟之不自爲德也盖自計
部公歿君任家督者幾三十年孝友尚義著稱于族
黨其拮据甚密支撐甚煩而學業不少輟顧困頓黷
校之日久矣晚乃應序貢入太學又五年謁銓得吉
安倅倅歷於守恒苦結約職事又繁猥揮霍之士不
樂就焉君得之欣然曰吾起明經佐巨郡方自慙忝
竊矧敢薄視一官乎既抵任而矢心廉慎兢兢焉惵
隕越也舊時郡倅督饟者多耽閒養尊移叢神於邑
佐君灼知其弊則堽竇室穴寬爲期會而躬程督之

田亭草卷十七

十三

冬四百四十八

嚮權舞文之吏不得詭借巧索以爲染指計即邑佐
亦受成供事而已以故事易集而民不擾當道聞之
咸嘖嘖稱曰此廉能吏導邵披窾材也盤根錯節可
挈而試矣邑令缺必借君攝之初攝永新已復攝永
寧皆劇邑胥史輿隸素稔君嚴明盥手奉法君弟詢
閭閻利病爲之興除卹茆獨緩催科葺黻宮優禮肅
衿子與講德問業循良之聲日起性又敏達善斷邑
中有疑難事必詣君剴決禾川兩巨室爭郭外甌脫
地民與士交閤不肯相下當道以其事屬君君檄學
博士與邑佐偕往按視士閤者學博糾之民閤者邑

佐糾之兩巨室凜凜各持券對簿參互左證而直枉立剖君徐出片言折焉事遂定蓋其吏事明決如此君素耐煩瘁又以上下方倚重黽勉弗辭往返郡邑間積勞構疾竟卒于郡邸囊篋朽然諸僚屬捐俸助之乃能具歛郡邑士民咸爲之隕涕云按狀翁氏家居郡城而籍永春宋江東提刑點自莆徙泉厥後有太師左丞相公尚簡數傳而至贈御史公勝又數傳爲太學生寬寬生輔輔生槐庭公環是爲君大父以計部公贈太僕寺丞君娶郭氏事舅姑孝謹家人宜之不數年卒有一女繼娶郡守陳公煌女無出而副

室吳舉男爲樞又繼娶郡守陳公選男太學生應宣女舉男爲機公享年五十有九子男二長爲樞萬曆庚戌進士次爲機公墓在晉江三十七都蔡山之原君曩所自營築也爲壙三今葬以萬曆庚戌十二月十三日中爲君藏左藏郭安人盧其右爲陳安人壽藏君之子爲樞謁余請銘怒然風木之思深痛君不待也有子如是即不待其奚戚銘曰學優矣而不必售仕優矣而不必寃遺厥緒業佑啓爾後天之報施善人亦奚必百歲之爲壽

常德府知府我湖李公暨配 勅封孺人陳氏

合葬墓誌銘

我湖李公余文社友也又時時接杯酒懽丁卯歲同舟北上入長安同旅舍朝夕周旋者五閱月情乃益親嗣是渺莽萍踪離合靡定比余釋春曹里居也公歸自楚竊謂香山之社可以杖屨相追隨顧爲公居廬故過從稀簡公釋服未幾而遽逝矣今公子重芳等卜葬公謁余請銘余實病弗任也而誼不得辭公諱道先字克登初名少楠字克冬至計偕始易今名公生七歲喪母黃孺人繼母太孺人林拊育之父文林公課公學銳甚月朔望集宗子弟爲文會每課皆公前茅文林公心竒之常自笑曰旁觀者謂我有譽兒癖乎公垂髫補邑弟子員先後學使者存菴金先生鳳阿姜先生試諸士皆首拔公尋以甲子舉鄉薦矣公性資磊落落道遙無障獨臨事疑定其勵學亦日孜孜曩同舟時余與郭柳州洪左使督榜人甚亟嘗乘颿揚帆逆黃河而上自甲夜徹曙弗休公力阻之余儕不能從然竟以公言爲正旅居足不踰閩雖困勸必焚膏夜坐日鍵關對甕牖余排闥視之則案頭置三蘇集焉蓋公之畏慎淬勵類如此既屢困公車

恒愀然嘆曰二親老矣不能早徼一命爲親榮謂子
情何侍文林公疾晝間醫藥夜禱北斗寢饋俱廢逮
憂居毀不自持二弟爲林太孺人所出者拊摩而教
誨之曰庶藉此報二親乎庚辰謁選授廣西桂林司
理直指使每按部於司理屬腹心耳目諸凡察官評
讞獄訟皆藉手焉公每事精核其聽讞不爲深文人
稱平恕壬午分校文武士得材獨盛直指使益委心
公矣然公於郡邑事特所屬意不第持大體自引重
已耳嘗署陽朔篆會均田事起公單騎遍歷壠畝手
畫心計無匿賦亦無溢額懽呼載道又嘗署蒼梧守
田亭草卷十七

蒼梧繇賦甲於粵西民稅四之商稅六之兵餉胥焉
倚辦公察贏縮剔羨耗令人按籍自輸佐軍興無乏
絕比還桂林惟圖書衣衾而已前後首膺薦剡者六
擬當奉璽書徵會郡守欲庇其所私墨吏藉援於公
而監司持之急守憾公遂螫公銓部徙爲衢州郡丞
公怡然履任謂三衢爲趙清獻公故里則題其署曰
琴鶴餘愧以見志云當道廉公賢其檄公攝令與守
也殆無虛日公居官課農麻戢奸暴愛賢禮士黔赤
衿弁咸宜之郡當水陸要衝郵籤旁午寇患山藪操
舟行剽公力裁冗濫均勞逸又請於兩臺沿江列舟

師游徼郵卒行旅稱便其攝令江山也均田定賦一
如在陽朔時民鏤碑頌德者二丞衢凡七載稍遷兩
浙鹽運司同知行橐蕭然人謂公真不愧琴鶴矣浙
鹽政視兩淮長蘆差簡而弊藪實繁公咨諏利便條
鹺議七十款白鹺使者著為令大都潔已惠商歲積
羨三千金盡歸公帑浙商民永賴之而是時公敷歷
久賢聲益溢矣尋遷為常德守公自喜且自勗曰天
斬吾一第乃得一第者猶或斬雙旌五馬吾其何以
報稱耶龔黃趙張顧為之何如耳至則却供應以風
僚屬省詞訟以免株連飭保甲以驅奸宄武陵有障

河土堤積歲埋圯公集三老議改砌以石出帑鐵贖
鍰為將作費比石堤告竣而閭畝晏如也縉紳士民
聚族而語吾郡千百年水利其在茲役守之功德鉅
且遠矣會乙未計吏中公中蜚語以原官調簡初公署
鹺篆時直指檄下按長吏不法狀公所為湍雪多方
而不能得之直指乃其人弗能諒也卒挾憤中公公
恬然受之無所憾既奔母喪歸讀禮襄事已無復謁
銓意念李氏宗祠未建行營湖山地飭材肇創煥然
一新凡宗人告急必赴紛構必解諸頌義者無窮疾
篤諸子受遺命不及家計其縣解如此公配陳孺人

侍御西郭公蕙之女子歸時文林公父母在養孺人
共奉兩世有孝敬之德相太守公夙宵勤毖有鷄鳴
之警茹糲衣布終其身弗改有葛覃之儉憐念庶子
逾于已出有樛木鳴鳩之惠蓋真足稱公配矣李氏
先世自唐江王避亂家閩至君達公而著數傳爲司
巡公森旌義賜爵載在郡邑乘中森生焯廣東南雄
府推官焯生將仕郎廷封廷封生錫錫生文林即公
澍娶孺人黃氏生公公滿司理考則贈父文林即母
黃贈孺人繼母林封太孺人而公配陳亦封孺人云
公享年六十有三孺人享年七十有二墓在惠安縣

田亭草卷十七

十八

李元三百九十六

十九都洛陽護蓋山之原葬以萬曆庚戌

日黃生曰士君子持論必重素風羞濁富顧世有不
諱貧者有偽稱貧者公宦游十有六載所至皆足自
潤而重董守先世田廬塍畝靡增輪寔不飾公嘗謂
楊關西以清白遺後聊用自况人亦信而慕之乃其
閨闈之內不至如此門大夫所憂者所資於內助亦
豈淺也泐士民追思公請于學使者祠公名宦銘曰
造物幻化或挹或酌公於登顯之途非有餘於駮歷
之途非不足所不足者林壑之逍遙而所有餘者宦
游之芳蠟壁焉雙輝車有輔轂勒此銘詞永光夜壑

中奉大夫江西右布政使仲葵許公暨配贈恭人李氏合葬墓誌銘

方伯仲葵許公以山東憲使入覲既辭闕下還抵任卒于官時已遷藩使于江右矣先是公叅藩西粵也緣入賀便道旋里屬有微恙遂移文兩臺乞休兩臺素重公勸駕諄切公強勉赴之而司銓者亦亟相柄用所推轂皆鉅藩崇撫在前遽爾長逝輿論惜之公諱國瓚字鼎卿先世爲光州固始人公祖諱鳳父贈中憲公諱執中傳尚書業著聲于郡庠生徒從游者甚盛公與伯兄太守公國誠並承家學後先舉進士人稱二難公之舉進士也歲在萬曆丁丑初授南京禮部主事奉父諱歸服除改戶部出監兌于蘇松凡曹卽奉爾書出者率持部使體自矜重事多抵牾公催兌精詳有法與屬邑令坦衷共事一切縟儀置弗較弟曰願爲公家協力耳而自奉曹約供億不繁官與民便之竣事還朝大司農特所器許諸曹事必諮詢委重公之名籍籍署中矣居五載晉僉東粵臬司分憲海北尋晉貴州少叅又奉母恭人諱歸會徐聞令以官評被糾科臣謂司憲者有所曲庇混糾及公與議以爲枉而銓司重違科臣言坐公當左調服除

赴銓得楚郴州守公恬然安之其爲政務在約已裕民而聽斷平恕兩造具服明久日孜孜職業弗爲遷客態也黔黎手額頌之閱歲餘遷南計部員外郎又三載遷守桂林嗣是遞擢副憲大叅皆在西粵蓋兩粵先後制臺雅知公謂公宦粵中久於物情疆事皆所夙諳若試游刃於窾郤公亦不憚遐遠時時自慰曰人臣顧自効何如耳遠近奚擇哉公才具敏贍濟以鎮定而復以仁心爲質即擁節憑熊嚴重矣視百姓猶赤子也在海北治珠盜多所全活又殄定李茂等叛黨兵不血刃灼其脅從可赦者立釋之人服爲

神明桂林爲省會郡民彫瘠甚公加意綏輯當簿書旁午揮霍如流而煦濡不少輟諸邑令咸則而効焉西粵苦徭徼剽掠宦其地者習以勦殺徼功公分臬右江駐賓州故八寨盜藪也公與守若令約曰鳥獸猶可馴狎而况人乎第以恩威戢之可耳閱三載不煩一旅而群徭帖息賓桂之民亦曰吾儕飽食安居無干戈賦役之擾者藉公庇也蓋公官兩粵者四所至德惠旁溢人皆祠而祝之逮總憲山東未三月以入計行矣知公者咸嘆其用之未寃焉勅中憲公久困諸生家苦貧二親歿弗能葬比公營中憲公葬

亦遂爲大父母疋馬鬣封時伯兄太守公未弟也公獨力肩之無遲回顧望意宦游中外三十餘載自俸錢外不家于官憂居日間苦匱乏有告匱者猶倒困傾橐助之或溷以干謁事輒不荅事伯兄恪謹待叔李二氏甚渥與共有無比宦達常祿足自給矣于諸內外姻戚殫心力調恤至爲解衣推食助葬舉婚若償宿負然其施于家鄉者又如此兩庠士暨鄉三老請祀公鄉賢蓋直道民心于今不泯云公配贈恭人李氏爲鳳池鄉處士李大科女鳳池之李邑右族也處士奇愛公文行故以女許焉恭人于歸後輒力勤

女紅佐儒業比從夫貴膺翟幘猶不忘布素念身無艷衣口無擇味方伯公居官居家兩有令聞恭人實與贊襄焉恭人歿公不再娶蓋其注念遠矣公享年六十有三子男五日都日熙皆國學生日躋弟子負日新國學生日懋公墓在晉江縣三十二都古圳鄉即公先年所自擇處也公子日都等先期來謁銘而伯兄太守公爲之狀狀皆質實語不佞第稍稍詮次無所緣飾而系之銘曰汝南平輿之旦評穎川膠東之民譽得之難兼推之不去夫既兼而有之名與實附青烏升卜昔同德者今同藏其光華永賁于封樹

梧州府知府槐江丁公墓表

吾郡簪纓閥閱日有聲寓內乃制科之盛則始自嘉靖庚戌又多達官顯人也槐江丁公起家曹即仕終二千石於宦籍不甚顯顧特燁然以名行者云公諱自申字某父封主事公某母安人張公自習舉子業時輒好攻古文詞握管數千言立就試常為諸士冠嘉靖己酉舉于鄉越明年成進士授南京工部營繕司主事進虞衡司郎中庚申出守順慶甲子調梧州留曹故閒寂南中又群籍藪也公博購異書視事外即扃戶繙閱迄丙夜乃罷以為常逮游宦蜀粵間載

之兼兩所為文飫醇質英酷類歐曾二氏雖簿書殷奏弗輟頌讀顏其退食之軒曰優則人或謂公方經營四方柰何蠹隱蠅吟作雕蟲技獨不為吏事地耶公於吏事則顧甚習順慶俗皆窳甚儲穡屬採木後歲惡閭閻凋劫公下車咨詢利病次第罷行之緩征繇釋淹繫兩造聽其質成無問鉤矢鞭笞取薄懲而已有其子甲偽為篆將識其私券籍未果而乙盜用之事覺坐二人死公曰造者不用者不造悉論從末減歲饑甲閉糴乙怒勉之顧實戚屬也理官當之劫盜律公曰是為親相盜矧犯由閉糴故甲終得晏

中輩語報罷公性伉直不能效俗吏婀娜態其僉憲
子上舍生託省覲來順慶頗通所屬餽遺公故弗為
禮曰君子以德愛人耳蒼梧監司某好嚴飭邊幅令
郡守懷牘入謁毋得從吏人公咲曰有令甲在吾熊
軾朱旂安能手牘局趣如椽吏鹽亭令受賕事發有
力者為居間直指以其事屬公令投百金為公壽公
曰令不受賕此物奚宜至哉竟按致之法凡公所為
強直自遂皆足失上官意然卒無悔也初公在虞衡
董園法事中貴人筦其柄者乘時欲有所乾沒公一
切以法裁之無或假貸識者預以此覘公矣既失官
家居棧戶逃寂自視膳問寢之暇日惟飭族屬建宗
祠于有司絕無所造請為樓數楹庋書數萬弓名其
堂曰希艸卒之前數日猶據案展閱不為疲云黃生
曰班氏傳文苑循吏各以其專長著惟黃文彊博習
經典而拊循魏郡足與衛颯任延並稱王仲通垂績
廬江而廣闢群書論著賦頌文多可採蓋庶幾兼長
矣余睹公生平實似之乃居官居家尤章章砥礪也
余蓋心欽鄉慕焉因表其大者勒諸麗牲之石

張母錢太孺人墓表

京兆張君自粵西馳一介寓書于黃生曰傷哉文熙之不孝也母歿而弗獲奉永訣也陟屺之慟終天靡極惟先生表吾母墓垂不朽庶藉以追辜者先是京兆君居京師一日忽心躍身顫君竊念曰其為吾母起居弗寧乎君母太孺人錢時從其仲子貳守延熙居紹興郡邸也君方敷門謀謁告無何而家僮自浙中至云太孺人疾革君遂疏乞假得省侍歸歸而道紹興省覲則太孺人疾瘳矣顧獨傷念其叔子嘉熙有歸志貳守君亦遂棄其官與京兆君奉母還粵既

田亭草卷十七

十五

王朋三百八十六

抵里而斑斕交映孫枝滿前歲時稱觴甚適神甚王也居二年為萬曆己丑京兆君逼簡書期矣太孺人督之曰而兄以艾齡投簪守子舍而復遭延不出誰當報國恩者京兆君甞勉束裝行至毘陵而太孺人卒君所為追慕感泣如不欲生者也太孺人家世廣西桂林人處士錢經之女己丑進士璧之妹鄧州學正贈侍御景華公繼室伯子東熙官隨州守景華公元配左出也太孺人子四為貳守延熙次貞熙蚤卒次嘉熙官龍泉令次文熙丁丑進士讀中祕書授監察御史擢順天府丞門閹燁為郡中冠侍御公諱騰

膏冠嘉靖壬午鄉薦司教于鄧太孺人從之官時姑徐方就養而前孺人尹母侯太孺人母左並在也太孺人身如麤糲耳澹泊而日理腴毳以供徐姑泊侯左二老人務得其懽洽人謂太孺人之為婦也有班姬之順焉侍御公性伉直與鄧州守迂則發憤嘆曰大丈夫安能日羈樊籠向鷄鶩爭一飽耶吾從此逝矣太孺人贊之遂投劾去而都授邑中諸弟子以經學顯者甚衆公弟及伯子亦先後薦鄉書矣公乃與里中公結吟社飛觴分韻月六七會以為常太孺人勤女紅織紵佐醴饌而復以其餘贏充諸女治裝

費侍御公得恬然嬉敖泉石者餘二十年人謂太孺人之相待御公也有萊婦鴻妻之風焉尹孺人卒時隨州君甫六齡耳又病弱太孺人至則昕夕為之噢咻親其燥濕真不啻己子也比稍長輒督之學不為姑息愛隨州君爰克踵前軌以不隕家聲人謂太孺人之為繼母也有翟子威繼母之德焉當侍御公歿貳守君已有聲于庠其餘藐諸孤學未就也太孺人儼然為諸子師日課使就傳稍嬉媚輒擯楚弗貸以故三子均由科第奮貳守君歷著官閱龍泉令不幸中道夫亦寢寢循良譽矣京兆君以直指使按兩浙

值兵民之變力為戡定太孺人方從貳君令餘干微
聞其事則謂貳守君曰吾季兒足辨此弟寄聲勉為
之勿以老人為意其識達大體如此太孺人壺訓嚴
教飭諸子率以礪名行慎官箴為誡諸子恪訓遂遂
即貞熙婦早稱未亡人亦蓬首冰心凜然勵栢舟節
人謂太孺人之肅閨閫也有申國夫人之範烏黃生
曰夫表者標也標其幽懿而揭之也古史冊所載令
妻賢毋身處閨閣而垂徽彤管聲施至今即具一德
焉已足標而著矣乃太孺人具美若是不宜永為女
史耀耶余謹為掇其懿行貽京兆君以勒諸墓石

誥贈奉政大夫河南按察司僉事龍岡朱公墓

表

贈臬憲大夫龍岡朱公之葬也蓋十六年往矣是歲丁亥厥子藩叅君貽書黃生曰先大夫葬時不肖東光未能爲親徼一命墓中之石闕焉未銘今幸徼

寵靈賁降隴矣猶思無以揚盛媿詔後觀也竊謂銘諸幽不如揭諸隧惟足下圖之黃生與藩叅君同省薦又同舉進士每驅馳南北憇足紫陽之鄉剽聞公質行頗具而藩叅君所爲傳及壙誌皆質言無緣飾語乃按而序之曰公諱埴別號龍岡曾祖澄行二祖

田亭草卷十七

廿八

黃四三百八十

相行一父攸行煬六世有隱德爲江右撫州臨川之百五都人煬六公客游建州以積著自饒給顧瞻于龍山天湖之墟徘徊不能去曰此大儒所居地也慨然有卜宅意逮公始寓籍浦城就郡治居焉公質魯而口呐煬六公遣詣塾師學授經史僅解其指歸不甚成誦煬六公咲曰是足給札記傳邴氏業耳顧諸子中端平侃直無如公遂屬公貲產而束裝歸奉溫清時公年甫十五且伯兄均在公奉命入市塵蓋葷酒不濡唇者逾半稔埃公旋之日告成事乃飲酒食肉如故也煬六公旣倦家政則折產爲三俾諸子修

業而息焉公讓腴受瘠讓豐受尠已乃汎胥濤於錢塘探禹穴於會稽放乎太湖夷猶於羊城擢武夷返曰天下壯游在是矣性素矻矻負氣有徂僧負商人金者責償諸賈客而波及公公弗爲動也則訟諸官竟枉坐代償而徂僧立空券付公公不勝憤曰夫擇術貴慎耳假令我冠博帶方領矩趨詎庸可枉乎自是謝家人產不問而一意課其子學時時指韋齋文公諸祠語之曰先哲在望子必勉之藩叅君奉公教凜凜猶時不免譴訶也比舉進士筮官平陽令取道迎養弗許之宦邸再三迎乃趨赴往竟不踰月歸屬

旅况蕭條行橐不備公登途人躍然喜矣里居與物無競而涇渭甚晰匪其類不交每歲首輒進族屬觴之諭以孝友禮讓漸毋玷德門宗黨翕然化焉郡邑大夫雅重公屢延公爲鄉飲賓童一再應其耽寂避喧類若此公生弘治乙丑十二月庚午卒隆慶辛未重九後二日享壽六十有七公雖蚤廢儒業晚年嗜頌讀求解悟尤喜軒岐鍼砭術若靈樞素問諸書昕夕不停閱能診脉决腸胃膏肓之疾若隔垣睹者居恒語人曰吾豈欲博秦越人之名聊以資調攝足矣顧未逮七十而卒命也夫丈夫子四長銍次鏢次即

藩叅君東光次東魯舉福建己卯省試方藩叅君以
循良內召擢爲給事中也上封事忤 旨留中不下
旁觀者或爲君危之君曰此先人遺教不肖何敢自
愛尋出僉臬憲敷歷有聲卽制詞稱公云蹈仁秉誼
式表鄉閭迪德貽謀玉成賢胤 聖天子明之萬里
已第令黃生疊疊千百言其何能加此華冢此用揭
于墓隧之石以闡潛德揚休命朱氏子孫其永世無
斃矣

贈承德郎南京戶部主事南石田公暨配安人

陳氏墓表

大田之田氏始爲延平尤溪人正德間增設邑治割尤溪數里隸焉因遂籍大田田氏世居梅山學憲公頊始以科第顯今計部君瑄翰讀君一雋後先成進士門閱甲于邑中邑長老私相詫曰大田者田氏始大也自建邑命名時若爲之預兆云黃生守南詞林計部君亦官留都一日謁黃生請曰瑄不肖謬博一第而祿弗逮吾父吾母幸且逮養矣又復棄去也先父母葬有年惟是墓上之碣未有所託敢微惠足下

田亭草卷十七

世一 冬三百十五字

爲阡隴光計部君溫恭雅飭篤行君子也蓋世德所由來遠矣按狀贈君諱銀字世重別號南石公生稟至性天資樸茂有葛天無懷氏風父處士公歿時公年尚幼輒號毀踰節竟老猶嬰孺慕也二三兄弟不相能公泫然流涕曰尤而効之即異日何以面先人地下溫遜篤愛不以其故少衰父母襄事一以身肩之無幾微顧望意課計部君學偶誦詩至常棣之三章則擊節沉吟若與意會然者伯兄嘗卧病床褥屬寇至衆相率逃竄公獨率婦子環守之曰兄弟急難正謂是矣吾義豈得獨全其至性如此仲兄婿遊

質省恒苦匱乏公每爲稱貸供之至捐已貲以償弗
計也山棲自耕讀外一無所問值鄉佐如詣官府招
之輒認認竦顏里有大役第輸金畀行者或豪橫漁
獵公亦逡巡應焉未嘗一色逕閭里中久滋重之居
常語計部君曰夫士先行誼詎寧咕嗶云乎哉人謂
公蓋以身範焉公配安人陳氏漳平右族也能讀內
則孝經諸書歸贈君以弗逮事舅姑爲憾輒斥簪珥
充營葬費嚴事諸伯如舅撫夫弟及妹曲備恩禮惟
恐拂贈君心也晚年家漸落益刻勵勤績泉以接衣
食恒不能溫飽至待賓客奉禴祀則務致豐腆性慈
祥樂振人之急即損日饒予之不色恠督諸子耕讀
夙宵忘勸錢穀出入皆手自籍記不以煩贈君計部
君舉進士次當爲令安人聞而喜曰邑令最親民吾
儕比落安全寔恃若父母藉令急催科繁刑法即闔
境靡寧吾且就吾兒宦邸側耳聽之庶不以敲朴聲
聒吾耳此其爲父母也大矣計部君銓令吳縣疾馳
入里下圖御安人就養而安人嬰劇疾矣閱二旬餘
竟不起計部君至今念之垂泣曰瑄叨宰百里黽勉
厥職以無得罪黔黎恃吾母遺訓也黃生曰夫窮閭
藜藿之士砥行鄉閭有聞章徹者豈鮮哉顧以李大

遜之孝友而不行於其妻大原王氏之夫婦偕隱同聲而負慙於其子蓋婉德詒穀若斯之難也迺贈君與安人皆媵節好修聲施里黨克俾計部君奉其矩矱以亢田氏宗此之爲德庸可使晦坳弗傳耶因論次其事歸計部君揭之于墓左

勅封承德郎南京工部都水司主事楓林黃公
墓表

封南京工部都水司主事楓林黃公故徽州休寧人
旅寓錢塘因家焉今南京禮部祠祭司主事金色公
仲子也祠部君兩令劇邑有政聲其令吾晉江時實
聞公計以去敝衣殘篋幾無以為歸也嗣由德興令
擢南水部以監督泉布事持法迥權貴人被誣劾罷
事既白迺起今官公家法驗已祠部君謁余請表公
墓余與君同進士舉君又有大造于吾邑勒在口碑
語亦有之飲河溯源乃按狀而序之曰公諱賜璋字

田亭草卷十七

世

王朋言十

廷錫公生四歲而父天序公歿母程孺人旦夕携公
顛天而祝曰天道有知其存黃氏孤以延厥胤乎群
從兄利其產則縱橫齟齬之公奉母命窟居錢塘修
計倪之業娶封太安人符氏相與勤嗇拮据因致饒
益乃間關歸葬父于水母伯塘而御程孺人東就朝
夕養居十一年而程孺人卒復扶櫬歸合窆焉公性
質厚慷慨樂振人之急歲值大侵穀價騰踊公悉倒
茵廩貸諸隣里度弗能償者還其券嘗買布付諸染
人染人質為食公憐其乏贖畀焉旋贖旋質亦竟置
弗問也外父符誠翁媪耄年不自給養殮殯葬皆藉

公貲穡且給其子孫不絕浮梁汪伯川者司訓龍泉坐事爲督學使者所攝冒雪失侶凍餓弗能自存公一見輒出衣被漿醪欸之遂爲石交復捐貲力爲營免終不責其償蓋輕財重義類如此從兄雲璋即曩齟齬公者也卧病于杭旅舍公延醫躬視湯藥死復經紀其喪有龍璋者稍知書嘗求公叔子中色爲後公命中色嗣之顧貲產已爲強者魚肉矣則怡然曰吾重違歿者意安問其它族黨中以此益頌公厚德云公有丈夫子四皆課令業儒行經師修每罄囊囊不少恡欸致諸僑士與其子游接引甚備至有待以

舉火者聞東廓鄒先生暨浙中名公講學于天真寺輒扶杖往聽仍遣諸子從學焉嘗呼謂其子曰古稱畏四知其實惟畏已知足矣居間整襟危坐養氣嗽津未嘗睹一疾言遽色于聖賢典訓與佛道家言誦法惟謹月率齋十日尤戒殺生日買放禽魚之屬倣曹溪法意即在貧窘時嘗嚮米以其餘啖烏雀鼯呼集坐隅令戢翼馴擾行年七十餘矣而顏猶童卒之日形神弗變公於真如谷神之旨良已涉其深哉公生弘治戊午閏十一月十五日卒隆慶己巳十二月二十四日子男四長尚色次即祠部君金色次中色

次正色俱庠生祠部君初葬公于錢塘龍華山不言
改葬于定北鄉范村之同豫山酉山卯向祠部君輯
宗譜考畧持眎余余受而讀之黃氏自新安守而下
太府丞而上閱簪纓一何綿邈也子孫義弗仕元
隱于耕植積著間以自娛適迄明興迹相沿襲未
有以詩書奮者詩書之澤乃昌自公當其子影惇踪
飄泊它境蓋艱危甚矣卒克成母志授子一經以昌
黃氏胤屹然偉丈夫哉非甚累行曷克臻此者乎夫
南陽之阡名者弗改白社之隧亭曰思賢揚之而逾
抑晦之而彌章厥繫在德余既次公行事而表之曰
黃氏孫子矣

此楓林黃公之墓異時過公墓下者當有永思奚啻

贈大中大夫山西布政司叅政孚齋陳公墓表
贈叅知孚齋陳公之葬也京山李太史本寧銘其墓
矣公之子方伯使君謂曩毀瘁中詮述先德猶多掛
漏爰致盛美未章復采撫見聞縷縷叙述委黃生表
焉愧蕪陋竊敢與名筆偶以大孝至念弗敢辭乃按
行畧次之曰公諱壘字庭玉先世居樂安之羅陂里
代多聞人公高祖世貞挾貨游三楚抵景陵之松石
覽勝裴徊因卜居焉娶李頤人生律寬律寬娶謝頤
人生清溪公守廉世積隱德清溪公娶黃淑人生公
比方伯使君貴贈清溪公及公皆中大夫山西叅政
而公母黃與配戴皆贈淑人公生有貴徵稍長風氣
道上屹屹負大志時伯兄茂才策仲兄司諭表學業
方轟起清溪公銳意督之未遑及公也公抑首下帷
既該洽復有精詣司諭公時發論難輒響應無窮且
若連柱五鹿君者司諭公大咤異曰昔人謂阿連才
悟而尊作常兒遇之者殆今日類乎言諸清溪公廼
督學暨臺使者皆軒然首列而季弟大治司訓範亦
連翩上矣每督學使至公三弟弟並躋高等仲季饒
于岸公既厄棘闈即需火負原亦弟值公處之澹如

也諸人士企慕公執經傳業者踵接時資其束脯以
供滫瀡佐誦讀貧弗克自行者置勿問公二子時已
嶷然穎拔公自慰曰老驥伏櫪汗血駒足任鞭策矣
遂一意課二子棄舉子業不復事事而獨里閭有義
舉恒黽勉爲群力倡所居松石三面据岡巒東窪下
常苦蕩析公倡於衆築隄捍衛值水溢則衝風沐雨
躬畚鍤先之隄藉以完復請於當道專官爲植而隄
孺崇隆比於岡阜嗣以旱潦不時議爲蓄洩計孺外
陳氏詠讒說有所抵牾悟出忿語侵公而方伯使君適
登省試公喜曰寧人侮我無我侮人遂躬造陳氏與

田亭草卷十七

廿八

卷元四百

爲和好如初人咸頌公功又服公雅量曰幸願哉公
有子也方伯使君將計偕公指坊金之半分贍親族
而別營道里費與偕北比薦南宮公語之曰攻駒範
馳良自不易吾以爾歸矣歸三載乃赴對制策已而
奔戴太淑人喪先後里居者幾以七載計自報謁邦
大夫外不許輒乘肩輿曰少年貴人坐車中令長老
引匿非萬石君家所禁耶里巷人謂公家橋梓依然
兩寒士也使君赴官起曹奉簡書典雲南試已而司
權武林公不色喜或貽書或面命以矢慎矢清爲戒
凜凜如也使君嘗市海錯吳縑上壽則拒弗內曰蔬

食禔褐足吾分矣安用此尋以權還滿考封公工部
郎日圖解組歸定省而公不待矣始公爲諸生時二
弟方耑學業已而仲氏復從宦庭闈溫清公朝夕周
旋獨多而二尊人獨最懽公養也清溪公嘗病疫殆
甚公不解衣而侍蚤夜搏顙顙天假寐間夢兩青衣
使者踵門瞪目視亟携牒去曰往隔岸某家耳寤以
告諸弟弟相與望空跽謝清溪公果霍然病已詰旦
聞隔岸某物故蓋與同姓字者仲氏初訓松滋以荆
爲材木藪謀爲黃淑人豫殮具而公任行過長湖巨
浪拍天舟幾覆公焚香虔禱蟻命不足恤柰貽九十

老母憂何旋返風無恙同舟人擬諸跛男子之庇而
不知公固孝感也此二事里黨嘖嘖並傳之弟第五
人友愛獨至疑相質文行相切劇晚年則醴茗晤對
色笑相綢洽迄垂白乃始折箸每有大工大役輒當
先綜理無它諉少季篋待以爲家若取諸寄已又撫
其孤而字之於貧宗維護特厚人人稱公家爲義門
性素慇然坦易不設城府即田畝里生咸與鈞禮所
訓勅族黨子姓惟令折節懲忿毋爲禍先邑豪樸田
於公季弟忽鮮衣怒馬群而至榜笞田奴公目季弟
謹避之歸其田勿與校乃其人竟以兇敗族年僑工

豪家被捶斃或謂奇貨可居者仲氏之傳婢亡今可
旁人陰爲踪跡至株綴十餘徒者公曰乘仇獵賄非
義蒙疑設筭非仁率皆置之意外漢川民某被剽掠
有所誣執爲盜者十三人公灼其冤力與諸弟弟議
又約於鄉不可當吾里而寬覆盆卒竭貲營救以免
蓋仁聲義問逾盜溢于里中矣公既拜綸命列在縉
紳絕不肯束帶入公府尤絕耻聞請寄事客以事來
謁者飲之醇酒至沉醉不憶所欲言即操重賄陷公
第應曰非望之福吾何德以承之度田事興產厚而
私營者衆公以才諳方嚴爲輿議所推舉履畝則壤

無私低昂闔邑頌之善哉陳孺子之爲宰也里黨有
虞芮爭必詣公亭質片言而解間有爲不善者猶悚
然曰陳君所短得無畏乎每歲儉度庾有餘糧即平
直質鬻或以贖金售家僮請追之公曰是或逼貧窶
以稱貸來追及之且有無聊之思姑已矣賦長若曹
若李寤積逋力不能支挈妻子而竄公多方招捩迄
用復業兩家尸而祝之不替居恒從一奚童徒步縱
行邑里與諸父老子弟譚陰晴占歲時豐歉所誦記
公車諫草諸籍及所習國家典故抵掌壘壘聽者傾
動或言其財至如流水恐且溢而涸又或言其宦壘

太盈侈恐且歎而傾卒皆如其言公之教于家大率
類此方伯使君所至以砥礪著聲式穀似也蓋劉勰
有言後漢以來碑碣雲起才鋒所斲莫高蔡邕彼其
時如姜徵君陳太丘郭有道士大夫景慕之相與刊
石立碑標厥德懿以垂永永其文詞則皆蔡中即筆
今碑文具在不知言重人耶抑人重言也贈公孝友
篤摯似姜徵君醇德化俗似陳太丘郭有道是宜標
美貞碣為世儀表顧余言燕陋視蔡中即愧甚讀斯
碑者尚論其世亦懍然可以興云公壽六十有八葬
皇華堰子男三長所前起歲薦今任某官次即方伯

田亭草卷七

使君所學癸未進士次某庠生

四

卷九 一百一



